

編

日奏議卷三



總督奏議卷之三目錄

題爲塘報疏

詳陳屯政疏

首逆成讐疏

題爲塘報疏

逆渠就撫疏

密擒賊渠疏

密擒賊渠疏

題爲塘報疏

密擒賊渠疏

密擒賊渠疏

自陳不職疏

題爲塘報疏

總督奏議卷之三

題爲塘報疏

題爲塘報事據原井陘兵備道今革職陳安國稱

據原差撫寇千總季佺范祖好稟稱二月二十三

日蒙本道票仰卑職隨即押撫降丁陳全忠等自

三岔進神堂關入險沿山一帶開誠佈公招撫西

寇餘孽佺等肩負食米步履羊腸夜宿野盤各深

山賊舊穴之處分撥降丁陳全忠等四下找尋高

三下落於三月十六日找至銀河山尋見高三密

約至姚吞石親見投降。至半夜，佺隨陳全忠先到姚吞石，果有高三帶領夥黨十二名，黑夜棄戈，親見卑職，誓願投降。爲此密報等情到道。據此理合塘報等情到臣。臣隨發票云：照得高三投誠，具見該道留心地方。干總季佺等前往招撫，更見該道知人之哲，功績難泯。但未見具有投見該道及本部院日期。擬合行知，爲此票仰該道卽察高三約於某日某處投見。該道不妨減從親赴山內，當面開諭，領高三赴本部院投誠，以便

題敘施行。並諭以手札去後。又據該道陳安國呈詳，據原差撫寇干總季佺等所報高三情形，已經塘報外。嗣本官帶領入山，新舊降丁陳全忠等赴道面稟高逆山中虛實情由到道。據此爲照本道奉旨革職，遵奉杜門卸事。真郡百姓哀稱高逆梗化多年，今實心投撫，若一旦謝事，恐徒費前功等語。本道因與胡推官密商一切機宜，着令面請憲示。本道先卽單騎馳詣其地，親行諭撫，除行胡推官帶領干總季佺並降丁陳全忠等馳赴本部院臺前

面議並候密授方畧早奏膚功施行等情到臣臣
復行牌云照得據該道呈詳差千總季佺帶領降
丁陳全忠等到本部院面稟高三所言足見本部
院前行之票扎已悉其心但高三就撫心懷疑畏
者總由前此山西失信於彼故彼今日難以遽信
殊不知本部院爲地方起見欲招撫休兵使百姓
安業若誘哄殺降不特失信於高三而先失信於
三省大非本部院爲地方之初心矣特開誠招撫
再行往諭其三岔防兵已票行崔天福撤回平山

外爲此票仰該道卽同本部院差去標下署守備
羅一成守備李垣並平山知縣范平及千總季佺
連騎減從不過十人由三岔入山令降丁陳全忠
等找尋高三面諭倘其慨然見信傾心投誠跟隨
出山投見本部院卽待以不死若高三自慮負固
多年恐不見宥於

朝廷本部院當以休兵省費之意連章力保如仍執
迷不悟逡巡顧畏亦不可強聽其自便可也該道
務將本部院一段真誠招撫之意申說明白勉力

圖之勿負士民挽留之誠與本部院委托之意也。等因。速行該道去後。臣竊照高三盤踞於五臺。肆害畿晉。業有年矣。不特近山一帶州縣田地荒蕪。村落丘墟。戕

朝廷之赤子。虧

國家之賦稅。卽屢次會勦。勞頓兵馬。糜費糧餉。不知凡幾。乃兵至則遁。兵去復出。狡謀詭計。卒難授首。臣是以請撤兵徐圖。相機勦撫。乃原井陘道陳安國能體臣心。密行偵探。間諜得人。業以招撫夥賊

邊還忠等前後七十餘人。復令千總季佺入山。開誠招諭。而高三慨然出見。立誓投誠。惟云昔日其父納款山西。頓被拘戮。尚有躊躇顧慮之意。塘報到臣。臣卽令該道親身入山。復差臣標署守備羅一成等授之方畧。曉以利害。示以誠心。協同執牌前往。相機進止。臣揣高三之意。以彼作孽日深。難逃

國法。且因前此有殺父之舉。故遠難見信耳。臣特援十年五月內奉

上諭內凡有嘯聚山林劫掠道路曾爲土賊者。無論人數多寡。罪犯大小。但能真心悔改。自首投誠。悉赦前罪之例。求

皇上赦其前罪。待以不死。彼必感悅不勝。自當傾心向化矣。至於陳安國。部議謂其輕易出示於武強武邑二縣。私開鹽禁一月有餘。雖志在恤民。實則違例。相應照戶部題定例革職。業奉

俞旨。本官已謝事候代。隨有真定府屬平山等十餘州縣士民。不憚數百里之遙。相率來臣衙門。涕泣保留。數日之中。投呈三十九紙。咸云該道無論其居官清勤。惠愛百姓。卽目今高賊就撫。全仗其力。可免小民無窮之害。若一旦去任。撫局不成。前功盡棄。懇乞

題留以救百姓等語。臣故仍令勉力入山。毋隳前績。但高三投誠機會。在此一瞬。恐安國以革職之故。未免心灰氣阻。難於踴躍趨事。伏乞

皇上破格寬宥。仍照革職准令待罪圖功。彼知自急功名。必當殫心竭力。以成招撫之功。在

總督奏請
卷之三
五
朝廷不過赦綠林一小醜。宥臣下一小過。若使招撫
來歸。將畿以西。晉以東。近山數十州縣之田地。不
至拋荒。數十州縣之生靈。盡皆安堵。而且永無征
調之煩。與糧餉之費。是所宥者小。而所全者大。蓋
臣本欲休兵息民。從

國計民生起見。反復思維。計無有便於此者。縱高賊
奸狡。終於梗化。陳安國負托。不能成功。然而

朝廷矜宥小蠢。惠安百姓之德意。已彰示於遠邇。將
聞風歸化者。益堅其志。固不徒在區區一高三也。

臣不揣冒昧。故敢急請。伏乞

皇上睿鑒。將高三赦其前罪。准與招安。將陳安國革
職管事。戴罪圖功。庶撫局可成。而地方攸賴矣。臣
謹具題請

旨

順治拾叁年肆月 日題奉

旨據奏高三立誓投誠深可嘉尚。如果傾心向化。作
何鼓勵。着陳安國招撫事宜。一併速議具奏。該部
知道

詳陳屯政疏

題爲詳陳屯政利弊事。准戶部咨。該本部覆察得
白添設興屯道廳以後。諸臣條議。疏稱興屯道廳
俱應歸併臣部。以各督撫身在地方。知見必確。請
勅各該督撫酌議各省情形。去後。今據陝西等六省
各督撫俱稱屯道應歸併守巡道。屯廳應歸併州
縣。其添設興屯道廳。俱應裁併。回奏前來。察先經
諸王大臣會議。奉

旨添設國計民生事關重大。臣部未敢輕議。應否歸

併伏候

皇上睿裁等因具題奉

旨據奏六省督撫皆言興屯道廳可裁着照議歸併
欽此到部備咨到臣准此竊照興屯之舉原因兵
燹之後田地荒蕪過多故議給本招民開墾上以

裕

國下以足民意非不善也而行之未善是以甫行未
久而條議不便者紛紛蒙

勅臣等從長確議今各省督撫覆

奏雖衆論微有不同而至言屯墾爲厲屯官當裁各
無異辭業奉

俞旨准照裁併矣然所以當裁當併之故臣更爲申

其說焉詳究諸臣立言之意非止爲屯官之當裁

惜此冗員耳蓋實因行法之未善大爲民厲也卽

就臣之所轄地方言之臣因料理兵馬去歲往河

南今歲復往山東臣每屏去輿仗單騎遊行潛至

村庄詢問民間利害咸稱最苦者無如屯墾一事

及至經過州縣士民紛紛控告牘幾盈案兩省所

言如出一口。究其稱苦者。咸云失業之民。初聞給本開墾。無不欣然樂從。及其徵租時。每田一畝。徵粟一斗。草一束。計其價值。斗粟值銀一錢六七分。束草值銀一二分不等。較之成熟民田。每畝起科。至多不過五分。是屯租且數倍於民糧矣。若遇災荒。價值愈騰。其苦更甚。是以此後相率畏懼。屯墾之念已灰。既不願墾。勢必令州縣開報。而州縣官又苦督責。自不得不虛報克數。攤派熟地。是民租必加重於原額。宜乎百姓之交口稱苦也。此法若

行。不特荒者永無開墾之期。而糧重民逃。將已熟又復成荒。是足民反以厲民。裕國反以病國矣。爲今之計。急宜除去屯田名色。將實在已墾者。仍入民田。照民租起科。虛報者盡行察出免追。其未墾荒田。仍責在州縣官設法招徠。照三年起科之例。聽民開墾。州縣官開墾數多者。督撫按特疏題薦。從優陞擢。倘有虛報邀功。令民包賠者。察出糾

叅重處。如此則民不苦於重斂。自爾樂從。官亦競於功名。咸思勉力。將見荒蕪漸闢。黃茂可期。此裕

國足民之本計也。若不改易絃轍，軫恤民艱，不幾貪目前之小利，貽天下之大害乎。臣親身閱歷，聞見最真，故敢諄切上

陳伏乞

睿鑒，勅部議覆施行。

順治拾叁年肆月

日題奉

旨，戶部確議具奏。

首逆成讐疏

題為首逆成讐架逃殺命叩乞

天鑒以除

國患以雪竒冤事竊照臣等奉

旨審擬王昌胤一案訂會於東昌府適中之地於四

月十九日齊集司道刑官將解到一千犯証秉公

矢慎逐細研究惟恐猶有枉縱反復詳勘窮數日

之力由司詳敘妥招去後今據山東按察司胡文

業呈詳該本司會同東昌道劉達充東道王胤祚

濟南道畢振姬會看得王昌胤宅心貪暴賦性奸
回始以貪橫而敗官繼因敗官而愈橫最重者莫
過於通賊殺人二事如王世白綠林巨寇也督工
挑白家庄之壕率衆起西河井之銀夥劫銀鞘書
送真定是世白倚昌胤爲護身之符而昌胤借世
白爲肆暴之助至已監斃之孫志洪現獲之楊文
業劉標并先案照提今拿獲之曹光通顧準脫逃
之張明強孫進或爲其僕人或出其門客當日周
可大劫鞞之案卷并新城縣獲賊之口供昭然具
在是窩通交結未有如此之真者曹灼曾經招撫
而公然殺之於市姚澤成以傭夫誤有違言斃之
於挺又使賊僕孫進等令羣賊毆殺王獲錫及克
賊被獲孫進給以見主故縱之逃是克心辣手未
有如此之甚者嚇韓源之銀霸曹煥之庄占畢際
竑等之宅地騙馬雲鯨等之銀物搶布店之貨財
奪商客之珠玉又其惡中之餘緒也昌胤旣開其
源衆惡隨揚其波王廣鎮收留迷女王永胤王進
績冒濫名器騙詐人財王京姦淫王氏安氏并僕

黨高標王獎劉仲英馮有光張文學張三捷李恂
張福及劣衿張桂秀許文煥等或爲抄搶或爲詐
騙率皆狐假虎威正所謂郭解之客殺人甚於目
殺者也會勘旣真法應律擬王昌胤楊文業曹光
通劉標按律應斬王京應絞王永胤王廣鎮高標
王獎顧準劉仲英馮有光張文學張三捷李恂張
福許文煥分別擬徒王進績張桂秀各以杖治賊
俱照追入官給主趙得濟二女給親完聚并馬雲
鯨等首出之銀騾併應入官王廣鑑張氏疏告逃

人及審則各出滿漢字文契一張難以憑信應解
部質審其王履胤夏肅係部發窩逃人犯但逃人
在京無憑質審應與逃人之子王九成妻韓氏一
併解部質審孫進等照提另結取問罪犯一名王
昌胤年四十七歲山東濟南府淄川縣人由進士
歷任福建道監察御史點差北直學院後因考核
奉

旨革職爲民狀招王昌胤楊文業俱各依強盜窩主
造意身雖不行而但分贓者律曹光通劉標俱合

依強盜已行而但得財者律各斬王京合依強姦者律絞顧準合依強盜已行而不得財者律王永胤合依誑騙人財物者律各杖一百徒四年張三捷劉仲英許文煥高標王獎張文學李恂張福馮有光俱合依白晝搶奪人財物者律各杖一百徒三年王廣鎮合依收留人家子女自留爲妾者律杖九十王進績張桂秀俱合依不應得爲而爲之事理重者律各杖八十王昌胤楊文燁曹光通劉標王京俱係重犯牢固詳決外王永胤王進績係

貢監張桂秀許文煥俱係生員王廣鎮係革職中書劉仲英係武舉人審俱有力各照例納米價銀贖罪顧準高標王獎張文學李恂張福馮有光張三捷俱係民審俱無力各照例免杖定發衝要驛遞各照徒年限擺站滿放王永胤王進績仍照冒籍起監事理發原籍爲民文煥等行學除名劉仲英應革去武舉供明人曹煥等各省放寧家肄業合候呈詳餘無再照伏乞憲裁施行等因到臣除王昌胤等犯証口供備敘招前無庸再贅外該臣

看得惡宦王昌胤名列縉紳實同盜跖其草菅人命吞剝多端貪惡異常固難縷悉然而罪在不赦者則無如窩盜一事如王世白孫志洪等以爲東省大盜肆虐於青齊之間勢難嚮邇昌胤乃聯爲腹心處以堂奧當世白之假招安以自固也昌胤則爲遺書真鎮好爲之所魯國男之回呈實爲左券至其撫後復叛仍以胤居爲三窟又不必論矣當志洪夥曹光通劉標等之劫鞘也昌胤則助以弓兵器械及巡道索賊卽於隨侍昌胤之側當獲

志洪總昌胤神手通天能刪招漏網其如當日之卷案昭然問官之面証確據何胤卽喙長三尺終難自解於窩盜也惟其窩盜有藉遂爾貪暴愈恣若劫殺若抄搶若姦霸若嚇索其間孤人之子寡人之妻拆人之伉儷致人之饑殍庭訊時衆口交叢和盤托出不特受害者咸腐心切齒涕泗交流卽旁觀者亦皆裂髮碎指數行泣下人怨入深天刑宜報若不撲殺此獠東土尚得一日有寧宇哉以故子侄僕輩倚勢橫行畧無顧忌其侄王廣鎮

竊趙得濟之二女以爲媵婢列衣冠而具盜行其
胞弟王永胤霸詐多端復與王進績昌籍負貢濫
入成均竊名器而有盜心其僕王京以家奴而克
公差強姦王安二氏其情更甚於盜其餘惡黨多
人如顧準劉仲英許文煥張桂秀張三提高標王
獎張文學李恂馮有光等共効奔走之能羣肆攫
拿之術是謂狐假而狗盜區區齊魯寧堪此輩蠶
食乎總之昌胤蓋始終於盜者也渠能庇盜盜亦
能庇渠歲時伏臘則贖金介壽遇有事發則歛金
救援恃有不足之維持不懼一朝之敗露以盜始
者應以盜終昌胤除殺人姦霸諸罪不坐外所當
照窩盜律與積窩之楊文業脫案之曹光通劉標
駢首棄市彰

國憲而快人心王京強姦有據擬絞允宜王廣鎮等
分別配杖猶屬輕典贓物人口各照追入官給主
至若王履胤者初亦聲勢相倚繼則反戈相向總
因擒殺黨盜王世白搆此讐怨耳乃乘機而摯其
兄逼其嫂掠其家資縱僕姦其諸妾以致聚積一

空淪亡五命噫亦太慘矣亦太甚矣宜履胤有不
平之鳴也今昌胤之罪狀已明履胤窩逃一案逃
人王大印未經部發無憑質審及王廣鑑張氏疏
告逃人審時各出滿漢文契難以憑信統聽解部
審斷既據司道勘信確擬覆經臣等公審明白謹
合詞具

題伏乞

睿鑒勅部議覆臣等遵奉施行

順治拾叁年伍月

日題奉

旨三法司核議具奏

題爲塘報疏

題爲塘報事案照前據井陘道差撫寇千總季佺
招撫西山逆寇尋見高三乞誓投降情由塘報到
臣臣隨經特疏

請留革職道臣陳安國照舊管事戴罪圖功以全撫
局並選差臣標員羅一成李垣同安國等前去開
誠招撫具

題在案今於本年五月十七日據陳安國塘報內稱
前據撫寇千總季佺報稱高鼎乞恩本道面撫情

由已經塘報在案。本道隨於四月二十六日會同督標中營署守備羅一成、守備李垣、真定知府佟彭年、推官胡文學、平山知縣范平、共同酌議。高鼎負固多年，變詐百出，屢聞踪跡不定，未知潛避何方。有羅一成、李垣、范平、本道差把總梁清業、范祚、奸引道，從三岔口入山前進。本道率領千總季佺、金定國引道，從龍泉關向五臺山前進。兩路找尋數日，並無踪跡。延至五月初六日，忽據降丁高景等報稱：高鼎藏躲兩省交界地面，名喚沙嶺子。本

道卽差人會合羅李二官，與平山知縣、板藤附葛前去面撫。於五月初十日，又據千總季佺、金定國二人報稱：密探的實消息，高鼎果然逃避其處。見伊卽將軍門老爺德意，招撫盛心，一一申說明白。高逆悔悟，淚下如雨。又聞本道同羅李二將與平山知縣俱到，高逆方信實心招撫，卽出山叩頭迎接。本日出首偽劄一十八張。本道於次日帶領高逆等三十餘人，俱赴三岔口，備將憲臺招撫之恩，開誠佈諭，窺高逆此番投誠，比前次大不相同。已

於本月十三日剃頭訖、本道卽欲率領高逆、前赴
轅門投見、隨據高逆稟稱尚有張二瓦等潛避深
山、今蒙軍門老爺大開生路、一時驟聚難全、若不
就此全撫餘黨、日後貽累小的、據伊再三稟稱伊
遣親子高毓秀、外甥王福洪、先赴大名投見、容後
將張二瓦招撫到日、卽跟隨本道、親叩見軍門老
爺等語、本道與羅一成等商酌、須暫准所稟之言、
住宿三岔口、收服餘黨、俟高逆果將張二瓦等賊
招撫到日、本道親領高逆等衆前來投見、則數百

里之人民、方免劫奪之患、幾州縣之荒蕪、始有開
墾之日矣、爲此理合塘報等因、隨於本月十八日、
據原差臣標官羅一成等、並千總季佺同前撫降
丁高景王士林等、率領高三子高毓秀、外甥王福
洪、併高三首過僞劄、及已經剃髮各逆、押解到臣、
逐一察詢驗明、臣隨卽分別鼓勵、原并徑道陳安
國、並臣標官羅一成、各給袍帽靴襪鞍馬、守備李
垣袍帽鞍馬、千總季佺袍帽銀牌、真定知府佟彭
年、推官胡文學、各袍一領、知縣范平袍帽銀牌、獎

勸及高毓秀王福洪高景等亦行宴賞各給袍帽
靴襪鞋帶除各領發仍令羅一成等將臣身穿戴
袍帽靴襪鞋帶腰刀給付高三以示優異併各降
丁及千把金定國等各花紅銀牌等項帶付三岔
再加曉諭一同招降來歸外該臣看得大逆高三
負固山西五臺等處遲疑梗化者原因前次投誠
晉省該省失信於彼故向後幾經勦撫總未見其
人邊山一帶釀禍有年今者仰藉

皇上德威遠播故陳安國羅一成等各皆盡力不避

艱險步履山谷屢揚

恩赦竭誠曉諭高三始感泣信從挺身就撫傾心剃
髮並出首所受偽總兵劄一紙偽叅將劄三紙偽
遊擊劄二紙空劄十二紙先令伊子高毓秀伊甥
王洪福前來投見伊仍候招駭黨張二瓦等齊集
一同投見此番足見真心悔悟將欲罄巢來歸但
恐黨羽執迷終懷疑畏伏乞

皇上慨賜

明旨一槩赦免其罪俟伊等投見之後仍察照各偽

割職銜。分別酌量。

題叙。及在事諸員。如臣標官羅一成。李垣真。定知府。佟彭年。推官胡文學。知縣范平。千把總季仝。金定。國梁。清業。范祚好等。另疏察叙外。至道臣陳安國。凜遵臣行。志切靖寇。艱苦備嘗。雖值因公被革。志終不墮。遂使數年未平之患。兩省隱伏之憂。收功於一旦。第善後事宜。責成攸重。其復職管事之曠恩。實有關於隣山各州縣數百里之人民田土。不得。不仰望於

皇上之洪慈也。除將疏中大意預為抄示。復行曉諭。伊等及高二並各降丁父母妻子家口。確察造冊。移咨晉撫察發。臣仍差大名府佐臣標千總填給。勘合前往搬取外。伏乞

勅下晉撫。照數給發。統祈

皇上勅部。速賜施行。

順治拾叁年伍月

日題奉

旨。高鼎既傾心向化。併伊子高毓秀。着從優議叙。仍令高鼎招其餘黨。悉赦前罪。俟來歸後。並與酌叙。

總督奏請
卷之三
陳安國招撫有功吏部議奏高鼎及降丁家口着
山西撫臣察明速發兵部知道

逆渠就撫疏

題爲逆渠就撫詳陳機宜仰請

睿裁以杜永患事竊照逆賊高三卽高鼎盤踞晉省
蹂躪畿壤潛通南逆授僞總兵蓄謀叵測已久矣
數年以來屢經勦撫卒皆罔效臣蒞任後時刻繫
懷正在相機勦撫間於本年五月初七日准兵部
咨該湖廣總督祖澤遠題爲飛報密擒渠逆叛黨
等事內有供出大叛渠魁陝西虞胤太行山牛光
天五臺山高鼎等奉

勅各該督撫嚴緝務獲。欽此。是高鼎乃叵測大寇。非同鼠竊狗偷。矧逼處腹心。患在肘腋。尤當亟爲剪除者。茲據原井陘道陳安國塘報。高鼎已於五月十三日剃頭就撫。繳首僞劄。先令伊子伊甥隨羅一成等赴臣投見。伊仍招其黨張二瓦等同來歸化。雖陳安國等能體臣心。竭蹙力辨。臣實仰賴皇上恩德。開誠招撫。俾數年梗化大逆。一旦歸誠。乃國家之福。生靈之幸也。此與運餉徵兵。勞師動費。相較。何啻霄壤乎。但高鼎負固多年。奸狡百出。雖經

三國等招徠。剃頭首劄。令子與甥前來見臣。然其親身尚未投到。似覺仍懷疑畏。想彼自揣造孽罪重。難道

天誅。因陳安國傾誠招撫。故相信投降。然而朝廷之意旨。彼尚未喻。是以輾轉顧慮。若欲釋其疑。以堅其志。則莫若速頒

明命。盡赦其罪。將陳安國仍復井陘道。其新道臣余應魁。令赴部另推。此因安國爲高三所見信。必倚安國爲憑依。庇以自安。且令知以革職之官。因招

撫而復職。則彼之疑畏必釋。况善後事宜。更費收
拾。恐另換生手。未能如安國之熟習。且無以取信
於高三。一或彼此失調。不幾前功盡棄乎。但功成
招忌。不無煽惑生端。此隣山州縣士民合詞借寇。
良有以也。臣之議留安國。正所以慰安高三。臣之
招撫高三。正所以鼓舞凡爲高三者。是以搬取其
家口。皆安其心。而絕其疑畏。若驚聞

朝廷之寵命。彼必感恩懼。永消反側矣。俟高三見
臣安插後。再疏議叙。臣仰見

皇上圖治盛心。廓清成算。欲以德威感化。使逆命歸
誠。將見

朝廷之德意。自不難幾干羽之化矣。夫欲醜類歸誠。
在於推心置腹。建功闢外。又在於破格用人。是以
臣有

赦高三留陳安國之請也。伏乞
乾斷施行。

順治拾叁年伍月

日題奉

旨據奏逆渠就撫具見該督用心招徠悉中機宜奏

內情節着速議具奏

臣等竊以

密擒賊渠疏

題為密擒賊渠以清盜源事。臣職司軍旅。矢志掃

除。自受事以來。每以寇賊克斥為慮。忽於本年閏

五月十八日。據臣旗鼓劉得功密稟。有密首人趙

名世。稟稱有馬家樓賊首王小崗。直省大盜。窩藏

山東河南各賊。劫掠地方。去歲攻破河南西華縣。

得銀許多。又議扒東明縣城。未果。現有夥賊趙志

洪等。一處同居。地界三省。族大房深。州縣不敢緝

拿。世係小崗工人。因崗欲圖殺害。故逃出投首。等

情。臣隨傳大名道暨臣中軍官密訊。供吐無異。臣復密提自訊。情事近實。臣方擬行地方官速捕。勿致滋蔓。據趙名世又供任鳳亭亦時來其家。臣伏思任鳳亭乃奉

旨緝拿之大盜也。蹂躪東豫有年。爲山東河南江北逋逃主。前督臣張存仁馬光輝屢捕未獲。臣方屢遣幹役跟踪。每以勢大巢多。出沒靡定。誠屬地方一隱憂。今既供常來小崗家。則小崗亦非常盜可比。隨密遣遊擊朱志麟。管內司將材中營署守備

事羅一成。管內司左營署守備事孫繩統。守備陳于庭。暨內司五營千把總等官。帶領馬兵一百五十人。於十八日二鼓出城。星夜疾趨。恐其勢困拒敵。又遣大名道晉淑軾。臣標中軍王國印。統領管內司將材右營署守備事李芝貞。守備李垣。大名道中軍守備王民豫。兵丁二百人接應。臣卽面諭道臣暨臣中軍。凡附近五十里內賊首。速捕勿失。若有任鳳亭信。當詳計而力擒之。遣發去後。隨於本月二十日。據該道塘報。內稱遊擊朱志麟等會

同東明知縣楊素蘊於十九日黎明圍住馬家樓。隨拿獲王小崗劉景寰丁泰李二青並歇案反獄強賊頓玉所。再搜出鐵盔甲五副。撒帶十副。弓二十張。箭二百枝。長鎗十五杆。銳鏢十杆。其餘贓物俟另單開報。隨審據王小崗供稱。打劫西華縣強賊張明時。綽號瞎搥。並摩天霞等。俱住附近地方。隨差守備陳于庭。千總閻崑壁於迤南張家庄搜獲張明時。因拒捕帶傷身死。其摩天霞脫逃未獲。又審據王小崗供稱。夥賊王三善人係小崗叔。在

王善友庄住。任鳳亭有信說來。不知來否。本道隨差守備李垣帶領官兵二十人。赴彼緝拿。續據李垣報稱。馬賊四五人。現今踞樓不下。卑職所領人少。乞添官兵。卽令署守備羅一成。率領官兵六十餘名。赴彼擒勦訖。俟有情形。另行塘報。等情到臣。除隨行申飭行間各官。嚴束兵士。務捕真盜。勿擾居民外。該臣看得。凡省會錯壤之地。必有大盜巨窩。潛居以地。無專主。而聲息易通也。今王小崗處東豫直隸之間。爲諸賊盟主。其流毒遠及西華。而

所窩皆盜案中錚錚者。猶幸發覺之早。不然東明一縣。又爲西華之續矣。今幸成擒。地方不日安謐。謹將擒賊情形。合先密

題伏乞

睿鑒施行。

順治拾叁年閏伍月

日題奉

旨兵部密速議奏

密擒賊渠疏

題爲密擒賊渠以清盜源事。案照臣前遣遊擊朱志麟。署守備羅一成等。續遣大名道晉淑軾。中軍副將王國印等。前後率領官兵。攻圍馬家樓。捉獲王小崗等。復分遣李垣。羅一成。搜捕王三善人等。已經臣

題報在案。本月二十三日。據該道報稱。將王小崗等同夥各賊姓名。現在研審。併獲胡立遠等十數人。審係無辜。已經釋放。所獲王小崗等贓物。除器械

報過外其衣類頭畜銀兩俱交發東明縣暫收訖
隨據羅一成等報稱職等圍庄有賊四五人踞樓
不下問職等是何處兵馬職等稱係大名督標你
等何人尚敢踞樓樓上一人口稱係任鳳亭的人
欲求投誠職等即問你既是任鳳亭的人任鳳亭
現在何處你引我等拿他來方允你投誠其人即
出身大聲說我即任鳳亭聞知這個總督能養人
我故要投誠不意遇你們兵來如許我投誠我即
輕身下樓當捕賊自効如不許任你攻樓總是一

死職等復問你是真任鳳亭麼彼又稱我起事多
年你營中豈沒人認得我的職等猶恐非真心投
誠未敢輕信彼即折箭發誓職等見其真切亦與
折箭發誓保其免死任鳳亭隨即率吳孔昭宋標
吳繼春共四人下樓並無王三善人隨帶有弓箭
四副腰刀四口馬五匹等情到道理合塘報等因
准此又據該道報稱除兩次獲賊王小崗等十五
名及招安任鳳亭等四名已經塘報外當有未獲
張翰如高秉初袁名煥察俱係定陶縣快手馬子

諒係黃河廳快手董長申係定陶縣人馬家樓距定陶三十餘里恐聞風逃遁隨差把總李萬輝暨本道差官劉瓊帶領兵丁赴彼擒拿去後隨據本官馳報已將張翰如袁名煥二人捉獲押解前來等情理合塘報又據該道另文申稱今曹州東明兩界地方盜賊屏跡本道商同王副將率領各官於二十一日撤兵回鎮等情到臣臣隨備花紅銀牌以俟賞勞鼓舞外於二十四日大名道晉淑軾中軍副將王國印率領原發官兵押解獲賊王小崗等十七名投誠任鳳亭等四名及盛甲馬匹弓箭器械等物回鎮臣隨率大名道並府廳縣暨中軍副將四營遊擊各官於臣衙門公同逐賊研審除口供長冗不便瑣瀆錄送兵部察核外該臣看得王小崗李二青劉景寰俱破西華縣賊供證有據僥倖漏網張八馬光宇丁泰韓清宇雖未同攻西華然劫掠橫行盜案非一而招納賄脫則王小崗郭龍台爲戎首所當請

旨駢斬以快人心者也劉旺成楊富榮賈洪有楊惠

備力於賊聽賊指使雖爲賊運賊把風而分賊無
據實係迫脇除楊惠審係逃人解部外餘當分別
懲處以矜無知者也頓玉所乃杞縣越獄之盜應
聽原案歸結趙自洪盜案在前招安後無爲盜之
實應送原招安衙門收管張翰如恃憑捕役擅殺
其讐難免一抵袁名煥雖爲王小崗所供原係翰
如一案牽連張成雖爲賊傭工案未上盜所當釋
放以恤無辜者也其未獲高秉初等俟緝獲另結
至任鳳亭等雖投誠出於一時然聞捕棄械慨然
下樓似亦識時知命者今其黨之在吳豫者實繁
有徒留之適足以消其黨所當
赦其藁街以示招徠者也除行間文武諸臣功次及
被傷兵丁容臣察明另疏外謹將獲賊始末先此
密題伏乞

睿鑒勅部議覆施行

順治拾叁年閏伍月

日題奉

旨兵部密速議奏

題爲塘報疏

題爲塘報事准吏部咨准兵部密咨該直省總督
李蔭祖題前事等因奉

旨高鼎旣傾心向化併伊子高毓秀着從優議叙仍
令高鼎招其餘黨悉赦前罪俟來歸後並與酌叙
陳安國招撫有功吏部議奏高鼎及降丁家口着
山西撫臣察明速發兵部知道欽此密咨到部該
臣等議得原任井陘道副使陳安國先因私開鹽
禁革職在案今據直省總督李蔭祖疏稱陳安國

志切靖寇艱苦備嘗雖因公被革志終不墮數年
未平之患兩省隱伏之憂收功一旦題請復職管
事前來陳安國應准復原職可也等因奉
旨陳安國准復原職欽此密封到部備咨到臣隨案
察臣原疏題云

請將陳安國仍復職井陘道其新道臣余應魁令赴
部另推荷蒙

睿鑒下部覆議陳安國准復原職奉有

旨欽此仰見

皇上念切地方生靈不惜破格爵賞如陳安國撫局
未竣特先

賜允復職雖爲鼓勵臣下俾竭力自効而實寓好生
勿殺令反側者自安也第臣原題陳安國之復職
井陘道者蓋爲井陘道統屬真定府州縣而撫高
三爲高三而留安國復職井陘道非爲安國計復
官職也若徒復其原職與真定府屬地方何益與
撫高三料理善後事務何關細繹部咨陳安國止
開准復原職未有復井陘道職字樣除卽移咨吏

部定奪以便遵行外又案察本月初六日據高三
差降丁石武投臣一稟內云沐恩小的高鼎叩稟
大恩主老爺案下蒙老爺天恩鼎等雖粉屍碎骨
難以言報於五月二十日有新任井陘余道爺差
委中軍官賞給袍帽靴襪銀一百兩除照帖給散
各丁置買種牛外但余道爺前任山西雁平道時
屢行招安鼎等尚未受撫目今余道爺恩無不寬
在鼎一人雖死何惜恐愚衆等心下恍惚鼎蒙老
爺知遇隆恩全活性命事在不得已不得不據實

稟報等情到臣臣隨發諭帖云諭降將高鼎據稟
新井陘道余副使差官持諭賞給袍帽靴襪銀一
百兩給散各丁置買種牛該道亦無非仰體上意
爲地方起見萬不可以前任山西未經受撫致生
遲疑且陳副使兩經題留見在部覆想指日必有
俞旨陳道余道皆本部院屬官有何恍惚如愚衆無
知當善爲開諭勿使懷畏此諭去後至十四日有
平山知縣范平因奉

旨行取赴京考選親來大名見臣投條陳五款臣除

酌量採行外復面詢彼中情形據本官言及昨新任余道賞發高三袍帽銀兩因差去中軍官不諳機宜帶領馬丁二十餘騎入山高三輩驚聞余道官兵遂闕思逃避幸有季佺以身命力保勉諭接受及中軍官回又索高三降丁四名引路送過紅子店距三岔九十里是夜未得回營高三等起疑因言余道前任山西雁平道時彼此打仗曾傷害余道多人余道曾計遣人送酒暗藏鴆毒害我亦常假說招撫引我的人去零星殺死十餘人此番

必仍用心術害我在我感沐天恩死亦無怨但衆人無知免不得裝鳥鎗撒路撥防備季佺因再三開諭云你們不知事體此係奉軍門招安余道爺乃係屬官豈敢違背上行所去四人如果殺害你一人你們將我殺死償命等語因天雨至次晚四丁歸營其疑少止奈彼手下多人仍各懷疑畏又因卑職行取目前離任舊井陘陳道復任無期各降丁自相惶惑無主依庇與士民哭泣哀求作主等情該臣看得高鼎盤踞西山負固有年臣未任

以前。幾經會勦。臣不得而知。及臣蒞任後。奉
旨直省兩次夾勦。頓兵深山。未獲鼎一的信。徒勞師
耗餉。開銷正項。將以數萬計。而地方百姓之物力。
猶不與焉。茲原任井陘道陳安國。仰遵臣行。竭誠
招撫。鼎遂傾心向化。剃髮首割。先令親子親甥投
見。仍收撫餘黨。暫駐三岔屯種。近察與民實甚相
安。揆其情。受撫最真。而度其心。懷疑未化。臣連疏
俱荷

皇仁。慨賜

赦旨。已經頒示。臣差官賞賚袍帽等物。雖叩頭領受。
尚未投見。猶疑以爲誘哄耳。此可徐以情孚。而不
可急圖取效也。近准部發鼎等劄付。臣已咨部暫
存。俟自晉省搬取各家口到日。安插完聚。先以示
朝廷寬大之恩。而後徐觀其行。不然。恩賞太驟。反致
生疑。蓋高鼎爲積年猾寇。雖由誠感歸化。脚跟尚
在未堅。臣察鼎所深信。視爲依庇者。惟陳安國一
人。故臣原題安國復任井陘道。實賴以固結其心。
接准部咨。准復安國原職。但未有井陘道字樣。其

新道余應魁亦未覆出。是否回部另推。臣隨咨回復請確示外。暨又據高鼎之投稟言新任余道前任雁平道夙讐。與夫平山知縣范平之條陳面述尤確。已一一備列疏前。不敢煩贅。總之臣爲地方而招撫高鼎。爲高鼎而請留安國。並復原任。如安國復任。果能善後有方。屯種收穫就緒。家口安置寧帖。引高鼎下山見臣。似應如臣所請。如其弗能。撫局無成。不但安國之職不應議復。卽臣任人不當。臣職亦應議革。臣旣任撫事。不得不通長計慮。

今據高鼎之稟。衆心恍惚。據實具稟。已情見乎詞矣。倘一月之內。陳安國不復任。井陘則撫事必致決裂。事關地方隱憂。不敢不據實備陳。除將高三原稟及臣發諭帖底案。並平山知縣范平條陳封送內院外。相應具題伏乞

睿鑒。速賜施行。

順治拾叁年陸月

日題奏

旨吏部速議具奏

密擒賊渠疏

題爲密擒賊渠以清盜源事准兵部咨該直省總督李蔭祖題前事等因奉

旨兵部密速議奏欽此該臣等看得督臣李蔭祖疏報前後遣發官兵緝獲大盜王小崗等公道府廳縣等官研審口供分別奏

請察疏內王小崗李二青劉景寰張八馬光宇丁泰韓清宇七名攻城劫掠供証有據併練長郭龍台結納亡命身爲盜窟俱應

勅下該督撫按卽行招擬具奏正法至劉旺成等九人相應如議其任鳳亭吳孔昭宋標吳繼春四名旣經投誠應赦其前罪以開向化之門但鳳亭等以爲巨寇恐其鷹眼未化應收入督標時加約束察點勿使借招安爲護身之符仍行不法其未獲高秉初等應責成該督撫嚴緝務獲以盡根株再察冊內有趙名世口供疏內遺落姓名是否賊犯應令該督察明補奏等因奏旨是依議行欽此移咨到臣准此隨傳集大名道同

臣標中軍官當令將任鳳亭吳孔昭宋標吳繼春四名領赴臣署叩頭跪聽宣諭

皇仁赦其前罪收留臣標時加約束外再照部察冊內有趙名世口供疏內遺落姓名是否賊犯令臣察明補奏該臣察得趙名世乃大盜王小崗僱工也因獲罪於小崗意欲殺害故潛逃赴臣投首察審情真隨遣發官兵始擒王小崗等繼招任鳳亭等俾強寇巨窩數年積患一旦掃除實由名世密首之力察名世未曾同夥又係原首除訊明有口

供登冊量行賞賚隨發大名道安插歸農未敢重
叙入疏今准部咨臣謹察明據實具

題伏乞

睿鑒勅部察照施行

順治拾叁年柒月

日題奉

旨兵部知道

密擒賊渠疏

題爲密擒賊渠以清盜源事准兵部咨該本部覆
臣題前事內稱議得任鳳亭吳孔昭宋標吳繼春
四名旣經投誠應

赦其前罪以開向化之門但鳳亭等久爲巨寇恐其
鷹眼未化應收入督標時加約束察點勿使借招
安爲護身之符仍行不法等因奉

旨是依議行欽此移咨到臣仰遵

明綸將任鳳亭等赦其前罪收錄臣標時加約束已

經另疏題

報外案照未准部咨之先據任鳳亭原名任復性吳孔昭宋標等各投稟爲懇恩提取家眷事稟稱蒙洪恩招安感恩非淺所有小的等家眷叩懇行文提取等情到臣除吳孔昭等家口另稟各州縣察取外內任鳳亭稟開妹夫姓王忘記名字妹子任氏妻李氏郝氏並家下人數口俱現在濟南府監羈據此隨稟行山東按察司察明暫爲收養候旨另題去後續據該司呈報據濟南府推官詹謹之

呈稱蒙此察得任鳳亭妹夫劉邦增不係姓王妹子任二姐卽任氏妻李氏妾郝氏並家下人數口俱現在收養聽候憲文發落今蒙行察擬合回報等情到司回報到臣隨傳任鳳亭面訊前據你稟妹夫姓王今該司廳察係劉邦增如何姓名不對面稱原本姓王後改姓劉卽是本人等情在案今准部咨該臣看得任鳳亭原係山東大寇盤踞榆園屯後託親劉邦增轉移家口於江南沛縣地方已革舉人閆爾梅庄房內有門管魏君重容留潛

居卽於九年十月內經督臣馬光輝緝獲審明具
題奉

勅嚴究擬罪屢駁臬司招勘而爾梅突報逃遁臣前
曾具刑官故縱一疏濟南推官詹謹之等已奉有
革職嚴緝之

旨此案尚在未結其案內所獲鳳亭家口迄今繫獄
再照年來鳳亭飄忽於吳豫等省糾黨日衆復謀
不軌洵屬地方大患臣正事擒緝伊乃識時歸命
棄戈投誠已荷

睿慈盡赦前罪臣思罪人免罪家口自宜一體從寬
行據該司察報伊妻妹與妹夫及家下人等似現
在似應取給令其完聚安置得所俾醜類皆感
皇仁咸思共遊浩蕩將見望風歸化不止此數人矣
但係

欽案人犯相應具題伏乞

勅部速賜議覆行臣遵奉施行

順治拾叁年捌月

日題奉

旨兵部議奏

日獻奉

自陳不職疏

奏爲自陳不職仰請

睿鑒亟賜罷斥以重

大典事准吏部咨爲題明

京察則例事內開一欵在外三品以上督撫俱自陳
不職等因奉

旨這京察各欵着照議行欽此備咨到臣准此竊照
臣見年二十八歲係正黃旗下於順治五年四月
內蒙

皇仁如天不卽擯斥掩短錄長於九年三月內叨推
都察院左僉都御史職司風憲敷歷罔聞十年三
月內陞兵部右侍郎贊協樞機凡此佐理部院種
種罪狀屢被譴罰俱載在部案可稽恭聽各堂官
覈實考核臣不敢瑣述茲臣披瀝所陳者臣歷任
勉竭愚赤譽尤實多乃

聖仁如天不卽擯斥掩短錄長於九年三月內叨推
都察院左僉都御史職司風憲敷歷罔聞十年三
月內陞兵部右侍郎贊協樞機凡此佐理部院種
種罪狀屢被譴罰俱載在部案可稽恭聽各堂官
覈實考核臣不敢瑣述茲臣披瀝所陳者臣歷任
既無成效乃復不以臣爲不才於十一年三月內
謬荷

廷推特蒙

簡畀陞臣兵部尚書兼都察院右副都御史總督直
隸山東河南臣何人斯叨此重寄敢不感

恩思奮異圖報稱於萬一所以不揣駑鈍竭蹶抵任
經今二載五閱月矣地方當兵荒積弛之餘簿書
叢集轄治遼濶臣與三省撫按兼同責成察臣任
內因稽遲咨奏通州各官職名罰俸六個月因稽

遲

題覆真定府屬蠲徵錢糧不明及原任固安知縣賈一奇任內錢糧不明二案違限各罰俸三個月因博平鄒縣察解逃人二案各罰俸三個月因安肅修堤不堅又檢舉不行詳察兩議共罰俸一年因題覆犯人謝見龍趙來遠二案違限各罰俸三個月

因

題覆犯官張弘典過限罰俸六個月又因保定等屬囚犯劉純臣等案遲久未結罰俸六個月以上雖

係各屬寫遠文到稽遲實由臣催督之不力按事薄罰已徼

寬政然臣不職猶有大者如臣職統三省爲諸司綱領生聚教養責在臣職必民安物阜

國用克足始稱無負斯任奈年來災患頻仍變異疊告實圖修省屢奉

明綸臣微誠不足以挽

天致流離日見其載道蠲恤煮賑幾費

皇仁臣不能盡存活而安宅之迄今戶口凋殘丁徭

失額民既逃亾地益荒燕臣督墾乏術荒未盡闢
就臣所親見者如河北之淇胙修武等處山東之
曹平高唐等處蘆葦遍地野獸成羣省會大路如
此則窮鄉僻邑又不知其何如也膏壤久爲廢土
賦稅憑何輸將蹙民生而虧

國計此臣之不職者一也再如盜賊生發爲害地方
臣仰遵

詔旨嚴飭各屬勦撫互用共期消弭奈鷹眼未化伏
莽猶存剽掠時聞寧息無日此又臣之不職者一

也再如察解逃人一事地方隱一逃人則旗下少
一工力矣地方拿一窩主則窩主處死地方十家
長隣佑流徙在版圖者去五人矣在

朝廷設重法以使其不敢窩正刑期於無刑耳乃屢
煩

天語之申飭部示之諄諭而臣凡遇司道府州縣各
官耳提而面命之且遍寫俚語明以利害使轉相
告誡宜若隱匿可止而不謂民愚不畏法窩隱如
故旗下逃人所獲甚少卽臣所轄地方每月所獲

不下百餘起則應處死流徙者約數百人此數百人者何莫非納糧應差之人丁也數年不能成一丁去一丁則荒一丁之地遺一丁之差歲月計之國賦不益虧民生不益感乎皆緣臣有奉法清逃之心而無導民遵法之術誤旗下並誤地方誤民命並誤

國賦此更臣不職之大者也臣自知不職者乃爾臣不知者尚多夙夜思維凜凜增懼謹遵例白陳伏乞

皇上亟加罷斥庶

大典肅而臣工知所策勵矣臣曷勝惶悚待

命之至謹具奏

聞伏候

勅旨

順治拾叁年捌月 日奏奉

旨卿擢任直省總督夙著勤勞着益殫猷爲以副委任不必求退該部院知道

題爲塘報疏

題爲塘報事准兵部咨該直省總督李蔭祖題前
事等因奉

旨高鼎旣傾心向化併伊子高毓秀着從優議叙仍
令高鼎招其餘黨悉赦前罪俟來歸後並與酌叙
陳安國招撫有功吏部議奏高鼎及降丁家口着
山西撫臣察明速發兵部知道欽此又該直省總
督李蔭祖題爲逆渠就撫詳陳機宜仰請

睿裁以杜永患事等因奉

旨據奏逆渠就撫具見該督用心招徠悉中機宜奏
內情由着速議具奏該部知道欽此該臣等看得
直督李蔭祖密奏大逆高三卽高鼎負固遲疑釀
禍有年今陳安國羅一成等竭誠曉諭高鼎就撫
先令伊子高毓秀伊甥王福洪前來投見等因高
鼎挺身就撫傾心剃髮並首出僞劄具見真心向
化除文官陳安國等聽吏部議覆僞劄俟到部日
焚燬高鼎並降丁家口行山西撫臣察明速發餘
黨悉赦前罪俟歸順續到酌叙外高鼎給以副將
職銜伊子高毓秀並伊外甥王福洪原疏未開有
投誠職銜今應各量給以守備職銜俱卽給劄以
示鼓勵俟鼎親身投見該督再議俸賞標官羅一
成等千把總季佺等兵丁高景等均有招撫之功
應俟高鼎親到撫局旣成之日另行分別議叙可
也等因奉

旨依議欽此爲此合咨貴部院煩照本部覆奉

旨內事理行令各官欽遵施行計釘發高鼎高毓秀
王福洪劄付各一張等因到臣准此除高鼎並降

丁各家口臣於拜疏後卽委大名府軍捕同知項始震同臣標千總姜應鳳執臣咨文前赴晉撫聽候察發搬取外部頒劄付三張臣已咨明兵部容臣暫收俟伊家口到日觀其行徑徐爲授劄仍俟伊親身投見再議俸賞並行令各官一體欽遵及多方宣揚

朝廷洪仁並捐發銀兩買給食米令伊及時佈種以堅撫志仍按時置賞袍帽靴襪布疋屢示恩信去後其家口到者俱次第安插大名時值

朝審撫按二臣俱集真定府臣因公事會議於九月二十二日自大名起馬至真定商同撫按二臣于十月初七日仍遣并陘道陳安國同羅一成李垣李佺等賚臣身用衣帽鞋帶鞍馬給高鼎並賞各降丁冬帽袍靴鞋帶腰刀傳諭高鼎分賞去後續於十月十二日辰時據該道陳安國塘報內稱本道於本月初七日遵奉憲諭本日會同羅一成等束裝就道初九日方抵三岔次日卽將憲臺諭帖並賚憲頒等物分賞降丁劉名成等俱各跪領訖

本道復將本部院諭帖內一切德意備細宣揚高
鼎等衆俱皆革心向化不勝痛哭流涕高鼎雖身
帶瘡痍伊心刻不容緩本日即便挺身啓行似此
十年之積寇翻然悔悟於一朝此皆本部院誠足
以格豚魚而德可以化頑梗也十一日已抵平山
十三日前赴真定爲此理合塘報嗣於十三日午
時高鼎帶領衆降丁至真定府投赴臣衙門口稱
受死時有奉

勅朝審部臣劉昌對哈納院臣能額吐張尚撫臣董

天機按臣胡秉忠同至臣署臣隨宣諭節次

皇仁赦其不死先令各望

闕叩頭後賞花紅酒筵及在事有功文武諸員鼓樂
導送用示獎勵至十五日傳鼎等齊赴公堂將部
頒前劄給付高鼎受職副將臣仍照伊劄職銜置
給頂帽朝服令北向叩頭謝

恩訖撫按二臣亦賞花紅銀兩馬匹俱仰體

皇仁共示鼓勵外該臣看得高鼎盤踞深山跳梁畿
晉梗化有年自本年五月識時歸命剃髮首劄令

伊子伊甥先出受撫伊稟暫住三岔名曰屯種荒
田實爲招撫餘孽期淨根株以報不殺

隆恩連月以來恪守

國法約束夥輩淡泊自甘頗與地方之民相安但投
見之期不果窺其意就撫情真度其心疑畏未釋

臣仰體

皇上寬大之恩不以急圖取效惟一意竭誠開導漸
啓頑蒙仍時加賞賚以示周恤俾數載執迷之積
寇頓感悟而向化今於十月十三日挺身率衆親

赴投見臣復面示恩威多方激勸將部發原劄給
付受職並賜官服收留臣標統回大名矣其內猶
有堪予職銜同各應給俸廩容臣察明另請三岔
地方酌議暫委官兵設防其經久事宜容臣另疏
條奏至安插過各撫丁名數及在事有功文武各
員統俟分別補贖叙報外謹將高鼎等投見授職
情形合先具題伏乞

睿鑒勅部察照施行

順治拾叁年拾月

日題奉

旨兵部議奏

恭摺陳明

臣等謹將

臣等謹將

臣等謹將

臣等謹將

臣等謹將

臣等謹將

臣等謹將

臣等謹將

臣等謹將

臣等謹將

臣等謹將

臣等謹將

臣等謹將

臣等謹將

臣等謹將

臣等謹將

臣等謹將



